

四庫全書

集部

欽定四庫全書

集部

瑤石山人稿卷十三

詳校官監察御史<sub>臣</sub>曹坦

中書<sub>臣</sub>劉源溥覆勘

總校官編修<sub>臣</sub>王燕緒

校對官中書<sub>臣</sub>陳木

謄錄監生<sub>臣</sub>恭安

欽定四庫全書

瑤石山人稿卷十二

明 黎民表 撰

七言律詩

舟抵胥江值王師東下

北來風雨滿長途  
濁酒他鄉客思孤  
銅柱烽烟連日夜  
樓船戈甲下江湖  
朝廷石畫誰今得  
諸將金貂莫浪圖  
白首看山重  
引興故園三徑任荒蕪

午日阻水橫石磯同陳亮夫舟中小酌

炎雨連山午不開  
青青蕭艾逐人來  
金沙轉觸還停舸  
錦席淹留誰共杯  
千里歸心懸宋棧  
孤村荒笛起秦臺  
釣魚亦有江邊石  
誰解乘槎到此迴

王曲江招遊芙蓉山寺

礪道青松百尺懸  
琴尊已在楚雲邊  
飛鳧倏化仙郎舄  
鼓瑟猶傳帝子篇  
三峽魚龍喧落日  
九成臺殿卧江烟  
亦知猿鶴窺人得  
不共桃花住歲年

夢吳明卿

楚粵風烟北地分  
南遷詞客不相聞  
楓林落日空懸夢  
濁酒狂歌擬對君  
百口移家經漲海  
幾行歸淚濕寒雲  
武陵一曲堪惆悵  
莫更殷勤老漢軍

經韶州贈李同野使君

同舍當時在舊京  
春風三度寄專城  
諸侯已是麟符貴  
大邑仍多鳳鳥鳴  
千仞芙蓉供卧閣  
滿樓烟雨有詩情  
龍門聲價人爭重  
不遣馮唐薦漢廷

陳亮夫以尊公司徒韶石詩見示依韻奉懷

溪流西望似河源青嶂凌空萬馬屯海上星辰朝帝座  
風前簫管下雲門晴陽弄色來衾枕飛翠當尊散鬱煩  
何事東山謝安石題詩猶憶卧龍村

馮方二方伯召飲滕王閣同余憲使德甫集

羽騎臨江夜不喧龍沙秋色照千門尊前舉扇黃塵遠  
月下聽歌玉樹翻劍氣直看連北斗使星今喜在南藩  
銅駝舊事休追憶賜履無忘聖主恩

五溪舫為宗室子深賦是日同余德甫集

仙人別館五溪濱  
終日垂竿卧水雲  
芳草密能容雉翳  
淥波晴自散鵝羣  
披裘未必干星象  
把劍真成動斗文  
江舸渺然愁去住  
府中聯句憶參軍

余德甫朱宗良用晦餞予於滕王閣文休承繼至  
分得朝字

西山凝望過崇朝  
暑氣真憐此地遥  
藂桂詞人方賦別  
白雲仙吏苦相招  
回看庾嶺無來鴈  
一去潯陽有暮潮

邂逅酒杯沾灑易天涯能不夢漁樵

王使君元美招同呂光祿遊硯山亭

丹梯千仞俯重溟驅傳來遊劇聚星山著暮雲還並紫  
天連高浪故搖青瀟湘歸客憐芳草吳下才人復此亭  
滿路風花相伴逐鷗鷺起長汀

扁舟昔日聞吳詠千里佳期願不違開府風流爭寂寞  
長安前事尚依稀明時敢謂輕朱紱舊隱誰同攬芟衣  
君是三旌恩獨異白蘋洲上肯思歸



過廣陵訪歐楨伯官舍

玄草何如執戟郎  
高齋終日坐清涼  
燕臺乍解雙龍劍  
汴水重遊兩鬢霜  
久客豈堪聞落水  
故人相見把垂楊  
賦才寂寞誰能薦  
猶媿含香入建章

李鳴卿黃定父諸子招同楨伯遊迷樓得春字

高閣風烟邗水濱  
千秋寂寞綺羅塵  
綵毫尚入燕城賦  
垂柳曾窺帝室春  
陌上放鷹憐野日  
尊前冠鵲盡幽人  
廣陵散後才情少  
驚見瑤枝發興新

邵睢陽召飲作

貂裘堤上早涼輕  
河水渾渾欲近城  
驅傳總如司馬倦  
裹糧空愧鄭莊名  
莫嗟留滯緣封事  
政喜中和布樂聲  
歸到漢廷重結襪  
故人相見是王生

馮別駕汝行招飲永寧寺

征軺已歷五雲邊  
重到花宮結勝緣  
草閣校書晨散吏  
風簷鳴鐸夜栖禪  
追遊曾忝東林後  
出牧誰居北地前  
高卧華陽堪白首  
祇將封禪惜流年

抵京王太僕儀甫許舍人稚幹梁舍人思伯偕康

洪管三山人見訪

關河迢遞豈堪論  
下馬秋風對一尊  
作賦屢同扳玉樹  
倚歌曾共宿麟園  
何求絃管西天落  
忽指旌旗上谷翻  
留滯周南成潦倒  
愧無長策獻君門

集陳大理玉叔宅得雲字

離離宮樹出重雲  
促漏銅街入夜聞  
寒露漸高仙掌色  
繁星遙動羽林軍

以大  
關故

歌傳白雪應難和  
坐引青藜喜

共分却倚東籬成獨醉誰將文似薦明君

集王武選宅對菊

木葉誰知楚客愁省郎三徑足淹留懸燈共照金花夕  
倚曲翻驚玉樹秋不為鉛華傷國艷轉因淪落見風流  
東籬滿把饒相笑十載長安縱意遊

同陳大理王叔集袁考功魯望旅寓

共促離觴月露前層城鐘漏隔林烟綵毫暫隱文園酒  
水鏡今推吏部賢草奏想承清燕對歸帆應待便風懸

薄遊曾忝曹郎後鴻鴈牽情入楚天

九日同諸公登感應觀閣

白玉壺中羽景懸樓居元自有神仙坐窺睥睨踈榆外  
杯引關山落鴈前楚客衣裳逢改歲漢廷烽火入窮邊  
桑田碧海空愁思誰解乘鸞向紫烟

潞河雪後寄梁許二舍人

雪後迴看霽後山金銀樓殿似堪扳算緡初隸司農省  
執蓋曾趨宿衛班一水遠從天漢下孤鴻終待上林還

長安柳絮知裁詠誰念飄零滯抱關

至日遣兒理入京省其舅氏

翩翩雙騎立河干遙望燕山雨後殘行橐已無金錯在  
路人猶作布衣看關城近別偏多思客路相隨祇一官  
白髮愧吾衰且賤鄰家兄弟在長安

胡北部卓孝廉自吳門至暫憩官舍過訊

與君傾蓋潞河堤千里長林暝色低旅服已經殘雪後  
征輶猶駐朔雲西梅花暫索仙曹賦春酒應從箸下攜

此去雲霄多舊識黃金臺上共扳躋

寄宗室瀑泉默菴兄弟

蒼梧翠竹似栖禪折節臨池却管絃  
掣筆少年知大令評書當日是才仙  
風簷細搗黃金粉月榭重吟白雪篇  
慙愧中郎今白首鴻都誰送買碑錢

雪中登感應觀閣次王太僕韻

高步仙臺喜對君烟花迢遞入楓宸  
城雲近帶晴霏濕苑樹遙連霽色新  
遊客正傷千里目歸鴻先報五陵春

江湖回首釣天夢猶有當時獻賦人

潞河作

一自分司出五陵簿書終日苦相仍北庭飛輓懸軍幕  
西嶺雲霞屬野僧祇有陸沈供晚歲莫將箕斂負中興  
遲回正憶桑榆煖目斷黃河十月冰

雪夜同陳太史仁甫陳大理玉叔康管二山人集  
梁思伯宅

入夜風聲漸細微不知塞色上人衣平連青閣千林暝



愁逐黃雲幾處飛上國烟花仍自媚天涯芳草待誰歸  
相逢劇對金尊好最是陽春此調稀

人日梁思伯康裕卿攜酒過曹使君旅寓

春日燕臺正值寒金花相促一杯歡三年重把詞臣袂  
千里虛勞漢使冠飛鳥下時天闕近跼鵝回首桂江難  
莫驚客路新雙鬢落月從前夢裏看

立春日同王太僕梁舍人彭鴻臚集楊儀部宅

苑外青旂帶雪翻殘冬風日亦微暄春盤生菜猶燕俗

濁酒椒花非故園歲有金錢霑近侍月頒銀管是明恩  
南宮聽履元相接不為玄經獨過門

送黃明府自燕還楚任興寧

金門執戟已蹉跎頗自歸心夢綠蘿五斗欲謀良夜醉  
雙鳬遙向帝城過芳洲鸚鵡誰題賦楚客衣裳舊製荷  
想到庾樓還騁望五雲宮闕故人多

題虬峰精舍圖為謝侍御

高枝五粒似龍蟠長夏陰霏灑雪寒清近射堂連碧草

影從文杏覆朱闌山中舊攬蒼精珮殿上今峨豸角冠  
一起東山慰霖雨莫因猿鶴故盤桓

將之雲中同曹大參康山人紀書記集揚儀部宅  
車騎重經宛洛春賞心惟遇好奇人梅花東閣才爭麗  
雲氣高臺望迥新白髮相看成去住金門一卧轉沈淪  
當尊又是千楊柳裘馬誰憐驛路塵

將之雲中別曹大參還西越

雨雪檐帷萬里來懽承瑤水賜金迴中朝先寵麟符重

百越山川繡斧開北地至今多駿馬潢池何事借詞才  
車輪忽漫東西去空戀風期上薊臺

浮圖峪有木積山甚峻

青磴雲霄不可扳飛狐中斷此當關河流東去盤孤碣  
營壘西行盡萬山夜火軍書猶告急春防戎馬未休閒  
允才敢勒燕然石奔走爭辭道路艱

寒食行廣昌道中

桑乾轉入薊門天歷盡闕城未到邊冠蓋偶稱秦使者

輅車又是晉山川  
春明拜手辭雙闕  
寒食離家已二年  
不獨介推逃祿去  
故鄉原少洛陽田

公署對北岳作

近隔丹梯祇十尋  
脩然涼氣襲衣襟  
天遙析木雲間斷  
勢壓玄冥分外陰  
陵谷暫移金檢沒  
烽烟不動寶符深  
鞭龍欲訪真源去  
乘屨誰同出世心

易州何觀察招飲贈言奉答一首

千里闔城攬佩刀  
聲華奕奕在東曹  
黃金尚憶登臺重

紫氣遙看出塞高誰謂書生魯汗馬盡令蕃將識旌旄  
從軍何用知王粲惟御龍門慶所遭

賈太守馮別駕招飲臨漪亭

雜花芳樹滿迴塘何似風光洛水旁開閣烟沙連大路  
登臺春色過衡陽詩篇幸借西堂草旅服初辭北地霜  
躍馬黃塵空慷慨富民今有漢循良

張憲使蕭甫招同楊參知登天雄城樓

落日憑高送目頻漳臺羅綺散餘春丹梯自繞青羊棧

樹色遙連白馬津  
賓榻至今惟孺子  
北門終合用詞人  
尊前羽扇何勞障  
正是中原息戰塵

途中有扈閣之命遂還京師留別蕭甫

春鴻飛盡過漳城  
馬首踟躕倦北征  
載筆敢煩明主詔  
解衣猶是故人情  
壯心未折風塵色  
高調爭論楚越聲  
揮手太行天地裏  
彩毫還賦漢西京

贈魏文學懋權

春風持節渡黃河  
作賦聞君掩薜蘿  
漳水詞人元獨盛

夷門賓客向來多天邊誰識青雲臺上爭鳴白玉珂  
無限太行山色在相思明月夢中過

朱蔡二牧招飲郡齋時雷雨驟作

漳河三月始聞雷郡閣陰風颯爽開城掛飛泉來五鹿  
浪翻殘照上三臺虛慙貴客臨卽飲難和高齋謝朓才  
畿輔試君今日意雙旌門外暫徘徊

送陳太史冊封楚藩

千里封輶豈薄遊朱衣朝日下龍樓鳴笳欲渡桃花水



解佩俄逢翠翰丹赤社風雲遙動色郢人歌曲自堪愁  
荊州豈獨歸時論已是中朝第一流

送蔡員外之徐州

聖明垂意在南方手詔常頒御座傍治粟正同王內史  
能書復似漢中郎衣裘荏苒經燕月關塞逶迤入楚鄉  
鹽鐵紛紛誰論難待君籌策獻巖廊

送梁僉憲思立之閩中

繡斧遙持出未央上方雲日駐清涼水晶禪室堪懸榻

蒼蘊花林細認香猿鶴故山今好在烽烟闕海遠相望  
功成早綰黃金印歸向東籬續舊觴

梁舍人李環衛招同王楊丘三曹長康曹管張四

山人遊鄧園得雲字

燕陽萬柳古來聞轉入清涼境自分夾岸生烟迷苑樹  
曲池流水泛宮雲花源豈合魚鳧占散地真成野鷗羣  
史漢對君談不厭露荷風葉已紛紛

送張羽王移六安

與君南浦一相逢聚散那知少定蹤白首天涯猶謫官  
故人雲路幾登龍心遙皖水城邊月夢落浮槎寺裏鐘  
莫嘆賦才無客薦長門誰是主恩濃

送李計部擁材九江

未央朝下雷雲光並載鸞書到故鄉執戟班行曾接武  
司農籌策最稱良趨程不厭羅浮遠掛席應憐瀑布長  
落日寸心還共赤掄材還復獻明堂

丘汝謙招遊觀象臺

帝城高築望仙臺  
眺迥應逢楚客杯  
瀚海烽烟晴不斷  
盧龍山色晚爭迴  
愁心併逐浮雲盡  
旅鬢還因木葉催  
關吏未須論氣色  
風流河朔幾人來

同王敬美待月梁思伯所

掖城青桂隱團團  
詞客開尊正耐看  
色過露盤分半壁  
影浮宮瓦動層瀾  
吹笳漸覺千門曙  
搗練誰知此夜寒  
無奈秋光常滯客  
幾回圓缺在長安

送顧岡卿致仕

當年直諫伏青蒲  
炯炯清冰照玉壺  
雙闕重來王氣盛  
江湖歸去客星孤  
著書合擬崔亭伯  
解組誰如疏大夫  
握手片言慙後輩  
扁舟從此夢遊吳

寄壽大司徒石渚馬公時有存問之典

朱衣獨坐幾人扳  
曾是中朝曳履班  
天上璣衡依北斗  
人間霖雨望東山  
平生匡濟心猶在  
歸去田園鬢未斑  
麟閣姓名誰似者  
留侯能托赤松還

翠釜黃封下日邊  
兩朝恩數故應全  
庭中賜馬桓榮老

席上揮金疏傳賢飛輓尚憐司計日參苓曾給住山年  
荀陳賓從何由托長望闕門紫氣前

諸公九日登毘盧閣余以病不赴

千里風烟引太行諸天晴色入傳觴茱萸漢殿逢秋序  
砧杵人家下夕陽青草未銷城上壘丹楓不待鴈前霜  
誰憐悵望東籬客得似龍山發興狂

元夕前偕梁舍人思伯攜酒過余伯祥旅寓邀周

潘劉黃諸子同集

河漢迢迢夜未央  
九微燈火雜星光  
風吹紫陌遊塵靜  
月上春城刻漏長  
浮白漫呼燕市酒  
圖黃休妬漢宮妝  
從來郢曲人難和  
無那高陽興自狂

贈劉真子兄弟

天中二景自為鄰  
賣藥飡霞學隱淪  
明月競馳千里足  
繁花留醉五陵春  
誰捐俠客雙龍劍  
自有嬌嬈對舞人  
賦就凌雲應召對  
何須東閣拜平津

同潘少承黃幼章過天寧寺訪蔡山人子畊

雙林持鉢老應慵  
尊酒惟便對雪峰  
文室烟花連小苑  
夾城雲日遞疎鐘  
相期祇有青精飯  
卜築先留白鶴蹤  
去住空門應不礙  
肯論歧路各西東

送李子藩參軍留都

曉奉潘輿出建章  
仙郎六傳正飛揚  
上台氣色聯花萼  
江左風流繞鳳凰  
蓮府日長惟畫諾  
桂坊天遠憶含香  
淮淝正是烽烟靜  
一過名園訪辟疆

送包萬戶彥和還楚幕



論交海內盡名流  
豈謂風塵尚黑裘  
公子何人虛左席  
將軍猶自借前籌  
三年下瀨功羞說  
此日浮湘鬢颯秋  
酌酒對君還慷慨  
澠池勲業異時收

送梁彥國卹刑江南

尊酒天涯惜共持  
梁鴻休訝出關遲  
中朝詞客頻推轂  
江左蒼生可察眉  
候館鶯花停節日  
縣人斗酒過家時  
漢廷斷獄還經術  
封事歸陳白玉墀

答方景武

尺書千里托飛鳶烽火飄零涕淚看大將此時思劇孟  
故人從古重任安夢回紫氣重關隔心折黃榆片月寒  
白首戎旃應不誤疎才今媿請纓難

送少師李公致仕還淮南

先皇御宇重詞臣手詔親題第一人望切上台因補袞  
恩深三極盡垂紳朝承清燕常焚草歸揖賓僚許吐茵  
便擬東山操杖履五湖烟水正迷津

未央佳氣轉氤氲退食遲迴每校文廿載超登門下省

兩朝重扈聖明君清闕終日無私謁草奏常時至夜分  
萬里臣心還咫尺豈能長戀白鷗羣

中原羽檄日交馳玉殿宵衣問六師片語獨當天  
下計寸衷還有聖人知玉闕初納名王款滄海頻收下瀨師  
帷幄論功誰解識麒麟圖畫肯教遲

大駕詣郊壇省牲恭賦

輦路仙雲凍不飛喧喧鐘鼓闕端闈殿前甲乙分綈幕  
日下星辰閃翠旂寶校自乘天上駟玉龍初御法宮衣

漢家俎豆遙增色五夜神光燭紫微

慶成宴恭賦

青壇練日禮初成左个回輿燕鎬京殿上魚龍傳舉醕  
雲中鸞鳳下吹笙星環翠幄來方國露溢華樽醉列卿  
簪筆汾陰曾侍從十年重覩泰階平

送葉侍御謫洽陽丞

雙鳧忽散薊門雲袖裏猶傳五色文手版正趨車騎府  
羽衣重謁太華君霜迎藍筍瞻前路日斷鵷鸞憶舊羣

愁思中原烽火日灞亭空遇老將軍

送任侍御出按江西

未央晴色閃朱旗  
繡斧親承下玉墀  
諫草共傳驄馬使  
賦才還起白雲司  
鷺車霜肅千山外  
龍劍光寒午夜時  
江海誅求憐此日  
皂囊披瀝聖明知

九日魯罔卿宅同諸公集

旅客初逢塞鴈來  
佩萸遙下栢梁臺  
十年已分烟霄隔  
此日那知酒盞開  
黃菊似愁霜鬢改  
碧雲應為艷歌迴

賓筵不獨征西貴況是當時作賦才

重陽後李環衛惟寅招飲對菊

日下螭頭瀑直回相逢三徑好啣杯浮雲晴逐清砧斷  
紫艷頻將妙舞催南國音書無鴈至天涯尊酒為誰開  
可憐月夜聞微詠惟有征西解愛才

送喬中翰啟仁乞假南還

委佩朝來下玉除鄉心還憶茂陵居霜前香稻宜烹鴈  
湖上金鰲入鱸魚劍鳥搖心趨紫閣星晨回首隔周廬

賦成肯待人才薦天祿當年美校書

送紀記室旭仁捧箋還嶺南

擊筑時能過我曹五陵詞賦况稱豪東朝兩度驂鸞至  
南國三年寄鴈勞客路秋風催緝芟帝城佳節近傳鰲  
烽烟一望連銅柱心折寒江白鷺濤

王太常仲諧招同孫孝廉潘光祿范鴻臚諸子遊  
神樂觀道館

緋烟晴日上寥陽松柏青青夾陞霜望氣祇看銀作闕

來遊真詫海成桑羽人異代知齊鼎詞客多時識舜裳  
不借王喬雙玉鳥乘風能到白雲鄉

送大司空陳洛南先生之留都

鎬京魚藻幾遊陪新佩龍淵表漢才千載衣冠開百粵  
一時風采望三台看花賜履名園遍憂國封書上苑來  
王氣只今天北極登臨休羨鳳凰臺

送歐陽幼承分司徐州

暫捐筆劄下蘭臺沛上東曹畫戟開詞客正為都水使



名家況接佩刀才中朝冠蓋頻年出滄海帆檣萬里來  
知爾壯心還躍馬肯論衰賤走塵埃

湖上居為余德甫賦

丈人結屋寄幽情綺檻倒影湖水明夜懸石鏡青天出  
曉望香爐紫霧生鷗鷺閒來爭坐席薜蘿聊復代簪纓  
浩歌擊楫杳然去一曲滄浪萬古情

送朱少參之洛中

十載論交識賦名中原回首正談兵薊門轉餉弭邊饗

薇省分曹重客卿風土不殊新洛邑烟花猶是大梁城  
垂綸漸覺滄洲遠猶為綈袍一愴情

答朱用晦見寄

黃塵趨走一官慵江海瑤華不易逢夢入匡山攜白鹿  
酒醒南浦泣雙龍廟堂豈待書生計雲水難追逸客蹤  
苦憶西園曾托乘幾回風雨落芙蓉

李惟寅招同顯靈宮望雪

紫閣關前望不賒春風攜興與人家青旗苑外猶飛雪

綺樹林中半著花  
三徑壺觴頻藉草  
五陵松栢欲棲鴉  
當筵彩筆俱能賦  
飄落西山幾片霞

同鄧徵甫朱在明遊西山抵夜宿金山寺

石林千仞削孤根  
飛閣遙臨小給園  
青竹代橋無結構  
紫蘿垂徑費扳援  
星河正落高僧榻  
猿鶴偏驚旅客魂  
起舞晨雞何事者  
不將瓢笠入雲門

明晨同徵甫在明遊玉龍洞題名其上

龍去山前空白雲  
流泉瀲灩靜偏聞  
梯懸地底星辰見

天入壺中氣象分  
持鉢懶過香積寺  
封書誰識洞庭君  
青苔石上聊饒記  
千載休疑鳥篆文

同徵甫在明入碧雲寺寺僧導飲流杯池上

鷺嶺東迴啟石扉  
嵐光竹色遞相依  
亭前古柳如人長  
木杪春泉作雪飛  
椿葉初齊供客飯  
蘚花猶碧染行衣  
清涼此地堪招隱  
久卧長安興自違

送曾大參子玉之閩中

翩翩車騎起行塵  
人識西曹草奏臣  
持節獨行秦內史

題詩還羨郢中人  
風前赤葉重關遠  
馬首黃雲二華春  
此去報恩知有地  
玄成相繼在楓宸

送王亮卿之塞上

客邸殘尊不共懽  
敝裘羸馬出長安  
黃河落日天邊見  
白首飛沙塞上看  
南國詞人堪借箸  
漢家諸將幾登壇  
籬花爛漫應相憶  
鴻鴈難禁九月寒

送孫僉憲捧表事竣還閩中

故園樵采與君同  
執戟那知侍漢宮  
十道朱衣馳使者

五陵華髮值秋風，鼎湖豈謂龍遊遠。  
栢府猶傳馬步工，試問旋車在何日。  
欲乘仙鯉訪壺公。

吳子化授武學博士還塞上

紫髯獵獵坐風生，結束新從定遠行。  
白草五原無探騎，黃蘆千里斷邊聲。  
軍諮共識陳琳最，都養何慙服慎名。  
東閣觀奇予忝竊，青袍虛自滯咸京。

周廷直茅平仲見過出新醞酌之同賦

誰擁寒貂獨過予，蓬門風雪帶郊墟。  
文章流落心還在。

湖海交遊興不疎  
喜客旋開釭面酒  
逢人應祕帳中書  
三山渺渺波濤外  
猶指雲林為卜居

除夜同少承長孺小飲得寒字

漢宮迎歲雪猶寒  
三徑蕭條促舊歡  
送客屠蘇吾獨後  
向人燈火夜將闌  
匣中龍劍憐雙起  
醉裏塵冠更一彈  
何事賦才成久滯  
青雲虛自滿長安

集劉憲使仲脩日沙園

栢梁詩句舊知名  
林下閒居最稱情  
花木近栽園別墅

雲山相對在重城向來草創高陽會此地流傳白雪聲  
誰是五陵豪舉客倦遊吾獨類長卿

寄許石城先生

鳳凰城闕隱神仙海內聲華四十年酒興正如光祿美  
人倫還比仲將賢當時下士曾推轂別後諸生少好玄  
慙媿掃門頭已白華陽真訣待君傳

同長孺登白塔得鐙字

宮闕參差見五陵置身如在白雲層寶花天外飛晴雨



明月松間續夜鐙漢署棲遲猶執戟禪房寂寞又逢僧  
彩毫無復江淹興攜手佳人思不勝

送鍾計部之臨清時李計部同使

司農今日政分憂千里黃河握上游南國詞人遜詩品  
中朝名士共仙舟當尊海岱諸峰出矯首燕雲王氣浮  
却笑風塵留滯客紫貂誰解酒家樓

贈黃石山人黃金之

巾烏塵中識者稀秦時黃石是耶非曾籌塞上風雲陣

苦應山中薜荔衣  
薊北琴尊成滯客  
江南烽火暗戎機  
洗兵誰挽天河水  
杖履同君住翠微

送袁勲卿邦表冊封河南諸藩兼迂太夫人

擬迂藍輿出建章  
關東持節倍輝光  
侍晨班已聯台衮  
轉餉功曾最廟廊  
餞送歸瑤水上  
詩情留醉玉笙傍  
聖明顧盼深如海  
不遣乘輅到故鄉

送張民部之河東轉運

畫省年多白髮侵  
四愁知爾有哀吟  
此行望氣同仙吏

不為移官廢賞心  
漉雪漸經河水落  
扳雲將及華山陰  
故園白鶴休相怨  
神武寧容遽陸沈

祇事昭陵述感

日角常瞻御扇前  
豈知人世有桑田  
金滕顧命留三相  
玉輦升中已一年  
封似灞陵終用儉  
衣留軒塚合成仙  
微臣握管恩偏重  
痛徹龍髯上九天

雨中望拜長陵

肅肅松區拜百官  
烟霄樓閣上巔巔  
崤陵風雨千山合

原廟衣冠萬代看玉座有衣留秘殿銅臺無淚灑長安  
烟塵不動威靈遠輦道晨趨鐵馬寒

送陸道函還大梁

翩翩文藻起平原白首含香奉至尊解組初辭夜郎國  
題詩還到孝王園關門積雪風猶慘河水新揚日漸喧  
宣室豈應忘名對知君不負仲長言

送莫公遠還杭

木落長安歸興濃敝裘羸馬怯相逢梅花欲發孤山寺

雲氣長過三竺峰詩卷行吟江上月蘿衣將掛澗邊松  
五湖何處堪招隱石上先題異客縱

送大參知鄭公入賀還蒼梧

兵甲潢池尚未收都亭重遣始安侯殊方瘴霧飛鳶地  
壯歲功名躍馬秋折檻久知臣節苦賜金多是主恩優  
歸心正逐乘槎使無那瀟湘轉北流

送方元素還新安

雙飛龍劍去江湖文采英英在玉壺豈愧司農門下士

曾從車騎府中趨鷄壇得爾渾增價燕市何時見過都  
愁絕風塵垂老日鷓鴣還解酒家壚

送莫雲卿歸雲間

觸目烟沙馬首重屠沽何處隱行蹤竹林酒德同諸阮  
洛下才名有二龍並世猶嗟難遇合邀懽真自不從容  
倦遊君且停車騎待我華陽策短筇

十三夜同莫公遠張羽王袁文穀梁公智別梁持  
伯之楚

客舍驚心見落鴻  
天涯舟楫待秋風  
留人最是銅駝陌  
把酒先邀玉兔宮  
城闕輕陰雙杵外  
關山歸夢一宵中  
青驪又逐江楓遠  
題札能無鳳沼東

送王開府之鄖陽

數馬才名接建章  
先聲已自懾戎羌  
軍中白羽無勅敵  
坐上朱衣總後行  
大國山川連楚望  
帝鄉風土近南陽  
含毫莫漫誇田獵  
手酌璇杓徧八荒

送黃金之歸莆陽

金匱要略卷之十二  
草屨逃名燕市中翻然歸翮欲凌空誰言采藥遺堯帝  
更喜無書寄子公食氣不妨形似鶴梯真應有路如虹  
蕙樓茵閣非無興滯迹風塵自不同

讀青蘿館集寄徐子興

誰解千金求絕技數篇真足慰沈冥  
來從海嶠生烟霧行過天津濯日星  
掩閣至今思畫諾在門時有好玄經  
倚歌寂寞長安市龍笛春陰起幔亭

同周公瑕崇寧菴送張羽王之蜀



天涯為客不曾懼燈火同君坐歲寒  
薜蘿每從僧舍問  
椒花那得故園看  
尊前殘雪催春色  
席上踈燈耿夜闌  
愁絕劍門千萬里  
好將絃管憶長安

病中禽沈太史肩吾見訊

盡日清闌應客遲  
尚傳芳訊慰支離  
舊趨虎觀稱良史  
新侍螭頭表直詞  
衰晚尚通金馬籍  
吹噓誰借上林枝  
持竿終擬江湖去  
風雨談天未可期

同歐楨伯過龍華寺訪汪仲淹

居士何心擬淨名閒尋車馬靜中行新開別業如龍樹  
直指西天入鳳城文賦每從揮麈就花林應與下帷清  
雪山原是初禪地苦行知能證道成

雨後湖山一覽亭同歐楨伯汪仲淹小坐

十載紅塵始一經偶同詞客賦青萍長堤水落蒼龍影  
斷葦風牽白鷺汀苑內樓臺含太液望中波浪恍宮亭  
誰言天漢人難到亦自乘槎有客星

為黃明府題海會圖

龍眠居士還癡絕不羨吳生老擅場幻出如來金粟影  
移將龍樹水晶房衣裳下拂天人石草木同霑佛國香  
京洛風塵空對畫豈知禪客倦津梁

凌貳守邀同闕文學遊泰山行祠

森臺風景入蕭寥疑有仙人秉節朝二塔風烟雲外矗  
五陵宮闕望中遙揮毫倚馬非吾事投轄留人值此宵  
十載對君仍拙宦官亭楊柳折長條

和陳公載致仕言懷

十載金華忝侍臣  
滄浪垂釣幾經春  
鼎湖回首風雲異  
橘井驚心草露新  
白髮愧為趨府客  
青山合有避賢人  
柴門掩斷漁樵路  
車馬空憐陌上塵

得豫章朱貞吉孔陽書却寄

歸心未問五湖船  
別後南州榻幾懸  
把酒暮鴻章水外  
擣衣明月漢宮前  
黃塵白髮猶千里  
怨鶴驚猿又隔年  
愁絕澧蘭何處寄  
江湖隨地有烽烟

瑤石山人稿卷十二

欽定四庫全書

瑤石山人稿卷十三

明 黎民表 撰

七言律詩

渡江別邵長孺李季常

越客歸心望海雲，銜杯猶自戀餘曛。  
交情落寞從今始，歧路風烟向此分。  
雙棹正迷桃葉渡，高城猶駐水犀軍。  
懷人後夜江天遠，多少新詞竹下聞。

朱子深招同朱貞吉遊爽臺

疎才曾忝侍長楊敢謂交游盡老蒼  
千里思君來竹徑幾回明月夢西堂  
風前桂棹閒相並雨後青松濕不妨  
却歎陳琳今卧病誰能題札寄清漳

朱宗良吉甫巍甫佳甫方士功趙修甫彭穉修招  
飲

梧竹成陰送晚涼可憐星聚在江鄉  
倦遊客已辭梁苑大雅名今起豫章  
歸棹琴樽堪作伴還家松菊未全荒

懷人千里看明月偏照龍沙水一方

謝廷尉招同方員外趙刺史集

燕臺幾度逐青驄留滯那知在漢宮涼雨一尊開白社  
暮雲千里望丹楓卜鄰我已慙王翰高卧人今憶謝公  
長袖燈前頻起舞不堪歧路復西東

寄楊開府 二首

借箸中原羨俊名牙旗遥鎮豫章城丹梯有路天庭近  
戰艦無波左蠡清盡日橐弓休甲士至今縣榻待諸生

謝公縱是諳戎略猶倩淮淝草木兵

栢府稜稜畫戟寒照人風采惠文冠斗牛下挾雙龍氣  
湖海還將一柱看略地昔曾收徼外佩符先已靖諸蠻  
掃門何處頭俱白矯首凌烟媿短翰

宿冲虛觀

陟磴攀蘿路幾尋飛雲影落萬峰陰仙壇蕪沒銅龍出  
帝厯悠長玉簡深醉後石函忘點檢年餘星髮任相侵  
敲厓許卜朱明洞白鳥時來倘寄音



尋葛洪東山菴故址

勾漏西遊心不愜  
栖真雲構在層巒  
梅花夢裏禽聲聒  
符竹陰中鳥篆殘  
仙吏時來玉局觀  
野樵留得紫金丹  
霓衣一去稀行跡  
始信人間脫屣難

天華精舍小集贈龐太守

青天雙瀑下階除  
十載漁樵此卜居  
桃谷風烟迷日月  
林光庭館是秦餘  
參苓旋摘新開醞  
猿鳥頻窺舊讀書  
清世抽身誰得似  
軒轅猶自待公車

過黃幼章欣賞亭看梅花

水竹清陰滿四鄰  
誰家池館似平津  
疎林冠絕穠華景  
小閣粧成澹泊春  
不用瑤臺攜佚女  
祇將姑射擬幽人  
金尊彩筆追隨地  
亦自風流繼後塵

梅花堂陳山人過訪

城裏青山舊卜鄰  
問奇時復過幽人  
庭無嘉樹堪留客  
園有梅花不當貧  
水石坐來忘歲月  
烟霞行處著衣巾  
習池敢謂風流在  
亦自蕭閒遠世塵

送惟節弟應貢北上

挾策那知烟水勞紛紛白雪上征袍  
吾家自有駒千里名世誰看鳳一毛  
別後玄談踈竹徑夢回寒色在蓬蒿  
長風滿送飛帆去直指燕臺漢日高

除夕前攜兒玖姪璐璘瑱等閒步自玉山遂登觀  
音閣

十載抽身返卧園青溪林木故應存  
淮淝已息飛書警漲海猶聞戰艦諠  
寂歷人烟連浦樹蕭疎風雪靜柴門

椒花秣酒供殘歲白首毋忘報漢恩

贛石同陳南雄羅平樂舟中小飲前夕同二君赴

戴贛州招遊鬱孤臺

朔風吹浪勢仍迴舟楫初經灩澦堆  
譙火遠明花石戍  
柁樓纔轉鬱孤臺江城喜值雙龍合  
候吏仍驅五馬來  
寒色不須催日暮深杯還待月華開

將至南浦先寄楊姚安懋功

漢庭儒雅似中郎六詔山川擲郡章  
未論主恩憐薏苡

祗緣詞客妒長楊  
兩湖日月開池籞  
九疊雲霞入草堂  
十載憶趨丞相府  
猶將衰鬢對柴桑

大中丞潘公召飲於行臺別院

散吏從容具綠尊  
南州風誼至今存  
韜鈴正待登樓賦  
水竹仍開樂志園  
白簡曾經飛漲海  
玄圭初錫自天門  
長安十載追趨地  
垂老難忘國士恩

玄隱亭為方司寇士功賦

衡門返鎖動經旬  
誰識西曹草奏臣  
散地一辭金馬詔

文園容卧白雲身江山次第勞詮品鵬鷃逍遙任性真  
莫笑玄成無所用侯芭歲晚得相親

艤滕王閣逢朱公子枉詩見投次韻奉答

楓林遙見一帆開騁望還登帝子臺千越人家江上盡  
咸陽王氣日邊來飛騰自有青雲翼邂逅能忘濁酒杯  
奕世聲華名不忝治安元待賈生才

朱宗良用晦貞吉魏甫佳甫楊懋功方士功趙修

甫邀集東湖草堂

豪游何似習家池爽氣西來晚共披一徑蘭苔鳴翡翠  
滿湖秋浪浴鳬鷺微名莫問青藜杖高調仍多白雪詞  
若有片言能止輦桂藂吾敢負歸期

東湖草堂為刺史趙修甫賦

誰從天外羨鴻冥浪迹湖邊一草亭風月自邀攜鶴舫  
行藏惟檢種魚經省知朱紱非長物肯待青山更勒銘  
隣並况憐徐孺子不妨重有少微星

途中聞歐楨伯補國子監

三仕猶聞擁客氊  
四門經館亦堪憐  
人同曳履歌商日  
士慶彈冠入洛年  
尚有諸生求月俸  
更逢齋禁剩公錢  
三都紙價知何似  
奏御應從紫閣前

答朱用晦

秋色章門入望來  
豈能乘興棹舟回  
登臨廬岳名山近  
亭沼芙蓉別業開  
昭代才名應繼起  
故人雞黍此重陪  
鄉園回首梅花隔  
猶自清塵憶楚臺

抱膝軒為朱宗良賦



五岳風期杖屨賒一軒青薜寄幽遐坐臨章水雙流玉  
窓落西山半面霞書帶漸成階下草綵毫還作夢中花  
躬耕莫問南陽事千里名駒在帝家

贈朱子深

老來招隱興偏濃爽氣時時對五峰書似淮南傳內學  
人從河上挹玄蹤上尊屢拜中朝賜靈笈多於世外逢  
蒲柳自知凡骨異何能雲路待相從

依隱亭為朱孔陽作

卜築還將隱者同  
朱絃多在此亭中  
路從荷芰芳湖繞  
夢與烟蘿絕島通  
修竹曾經梁苑賦  
白茆何謝陸家風  
卧遊久矣憐宗炳  
策杖何時到桂叢

朱孔陽攜酒舟中因贈

津亭欲別轉夷猶  
應有詞人攬桂留  
一片歸心懸暮雨  
數聲長笛起新秋  
著書誰授關門尹  
共載虛疑郭泰舟  
欲問前期何處是  
楚雲湘水共悠悠

解維後方士功  
朱貞吉孔陽追送至龍沙龍光寺

小飲而別

昏鐘山寺已棲鴉起踏長堤片日斜  
浦口風燈漁父棹雲中雞犬羽人家  
江流不盡心同折世事重逢鬢有華  
歧路蒼茫君自見青門元少故侯瓜

舒大參招飲卧龍寺

獵獵寒風少雁行朱旗門外裂飛霜  
經禪握麈同高座酒盞論交是故鄉  
帷幕功當歸圯上循良名自起河陽  
徐關正是安流日莫指青山古戰場

過慈仁丈室訪胡孟弢留酌

匡山高卧意如何，遠興難忘在薜蘿。  
偶過禪房成下榻，相逢天路待鳴珂。  
雙林風雪經春盡，西嶺雲霞入暮多。  
知是甘泉新有賦，休將禪解問維摩。

沈純甫歐楨伯招同徐子與集李惟寅第

一自歸耕下潁田，豈知杯酒共談天。  
正朝車馬春城裏，右轄風流紫閣邊。  
醉後和歌成白雪，燈前看劍是龍淵。  
故人漢殿今持橐，肯借聲華照別筵。

方奉常李明府招同徐方伯歐博士集廣惠寺

花時曾共醉長安漢殿威儀備從官  
蘭草每從西省握貝經頻對竺僧看  
重來冠蓋人非昔一落江湖計轉難  
不是夷門賓客在風塵吾已倦彈冠

程無過程虞仲招同歐博士楨伯陸山人華甫邵

文學長孺潘上舍子朋登廣濟寺藏經閣

程楨伯門

人

鷺嶺雙開小梵天香燈處處可隨緣  
娑羅影半侵書閣

蘼蔔花偏泥酒禪遠目正當春雁後鄉心多在海雲邊  
誰操杖履供遊興絳帳諸生有鄭玄

送顧參軍擢守曲靖

幕府官閒似馬曹三年越調自君操才情合占波千頃  
時論同歸鳳一毛泔水西行通竹箬溪春汎接香醪  
家聲自著循良傳詞客何須解佩刀

送張京兆孺覺歸省

燕市勞歌頻對酒章臺垂柳拂征鞍中朝專席名家子

三輔行春漢使冠芳草送人江路永烟蘿歸夢石牕寒  
彩衣舞罷庭闈日華省思君共握蘭

端午日李明府招同沈刑部姚大名方計部歐博  
士王太僕集顯靈道館得宮字

琴酒誰將市隱同碧梧疎竹引離宮龍門謁客曾修刺  
緱嶺吹笙幾馭風雙壁並高華省譽彩毫真有漢都雄  
天涯蕭艾空愁思歸路能無馬首東

張林石几為呂心文賦

琢成山骨似方諸  
隱座支頤自有餘  
不遇卞和誰證玉  
偶逢王令即留書  
紫藤過雨痕猶漬  
碧蘚經秋駁未踈  
松下尋仙應有待  
平泉醒酒待何如

送姚叔卿移桂陽

中朝執戟早為郎  
豈意雲霄落羽傷  
一卧攝山迷藥草  
幾從江左擅文章  
明時不重懷沙賦  
遠播知無適越裝  
藉藉廣平聲績在  
御屏前已記循良

送方計部子及還留都



畫省三年報政成，秋風吹客復南征。  
佩魚湘水名猶在，策駿燕臺坐盡傾。  
西第歌鐘憐卜夜，司農飛輓待趨程。  
搖心花柳秦淮路，曾是江東老步兵。

送舍甥黃公紹之山陰文學

入越游吳不憚勞，莫言湖海少綈袍。  
長途豈墜青雲價，下里寧知白雪操。  
桂浦別來鄉夢斷，梅梁經過海雲高。  
春風坐遍諸生日，綵筆先傳曲水濤。

習儀後李臨淮史計部兄弟邀陪王使君敬美集

顯靈道院

太清竟罷散鳴環  
梧竹蕭疎一徑間  
地主冰霜森武庫  
使君車騎自廬山  
流雲下拂果  
愚影仙氣遙連虎  
豹關  
一別玄都知幾日  
對君雙鬢已成班

聞王敬美談太華之勝同李惟寅賦

立馬關門紫氣前  
丹梯無路可扳緣  
地形下見秦中盡  
鳥路翻從掌上懸  
西極千峰朝白帝  
黃河一線落高天  
食霞無復蕭臺女  
得馭茆龍亦可憐

七夕同丁計部蔡刑部歐博士集沈刑部宅觀沈  
石田山水得秋字

長安木葉下新秋坐對雙星緩客愁明月漸收藏扇篋  
涼風偏在曝衣樓休文詞賦緣多病宗炳琴尊托卧遊  
誰道七襄難報贈才人先有夜光投

丁計部蔡刑部沈刑部歐博士過山齋作

秋風客賦不堪裁何意蓬蒿二仲來飛雨遠連雙闕暝  
殘花猶共一尊開長途意氣看君在高步雲霄見爾才

惡說習池騎馬去淹留須盡故人杯

同丁計部沈刑部歐博士陸山人集蔡刑部宅觀  
唐伯虎所臨蘭亭禊帖并圖書贈計部南還得  
和字

市烟宮樹晚相和三徑頻留白玉珂西掖新篇堪倚馬  
東吳狂墨亦籠驚千秋破塚名逾重百衆登壇世不多  
日下山陰將理棹不知修禊近如何

送潘子朋南還

一攜經笥趨西學幾載琴尊共帝京  
詞藻世傳潘騎省  
園林人比蔣元卿  
心馳護草三春色  
行計梅花萬里程  
歸著子虛應謝客  
梯樓惟見日初生

九日同歐博士顧鴻臚兄弟李明府鄭張二光祿

邵孝廉登廣濟寺藏經閣得陽字

禁柳宮槐拂地黃  
雙林風日入重陽  
蓮花纔吐千燈燄  
白玉羞簪兩鬢霜  
畫手難忘金粟影  
禪栖為借贊公房  
茱萸滿地應相笑  
肯負東籬此日觴

壽錢侍御父母

星文遙夜聚江鄉  
籬菊催春入壽觴  
南岳寄書傳白鶴  
中朝新彩賜神羊  
玳筵分送黃封酒  
紫殿遙傳白簡霜  
莫倚太行頻極目  
蘭臺恩澤與天長

大司馬曾公以予晉秩為喜  
招歐博士兄弟陸山人於別館觴焉  
明日垂示佳篇念舊之情溢於言外  
伏誦感激謹用探韻奉酬

曾從蘭省挹風流  
別墅琴尊感昔遊  
白雪座中傳麗藻

黃花籬下入新秋時名謬許同冠鶚人望於今重借籌  
衣馬長安心已倦五湖波浪有漁舟

送董侍御出按關中

單車曾識漢循良歸去仙闈攬舜裳關外霜威傳繡斧  
殿前風采冠神羊行逢暮雨峭函遠望入黃雲隴坂長  
萬里玉門無斥堠詞人何用羨長楊

送歐博士季弟經季還南海

共道聲名入洛時雙珠南海亦稱奇逢人自識冥鴻羽

別路俄分玉樹枝  
楚澤蕙蘭收客泪  
秦封苔蘚與君期  
對牀莫訝青氈冷  
幾夜西堂有和詩

送陸華甫

心情野鶴共摧藏  
老去逢秋亦自傷  
澤畔羊裘千氣象  
匣中龍劍躍干將  
葑田莫問將歸計  
薪桂應愁久客裝  
不學磻溪垂釣叟  
豈知顏駟尚為郎

送汪鳳岐參軍之塞上

亭障東行烽堠少  
幕庭因得引文儒  
吹笳城上知風色



聚米軍前識地圖  
翠鈿擁迴朱鬣馬  
金杯催勸紫駝酥  
才名不用輕投筆  
舊勒燕然尚在無

過李臨淮白雲齋逢恩上人還金陵因贈

老向江東獻賦慵  
攝山猶憶舊游蹤  
朱門客自開文苑  
白足人今是律宗  
隱處不離高座寺  
中原亦有竺乾峰  
知君去住心無累  
秉燭尊前幾度逢

送何仁甫還楚故司空吉陽之子

登臺自許千金價  
滿座能傳入洛詩  
黃石授書吾已後

相如成賦爾同時將歸不為求田計失路猶懷戀主私  
江漢風流今在否杖藜來話鹿門期

寄壽錢叔寶

問壽誰能知甲子高風還似隱  
支硎年收杭秫堪娛老  
舊餌參苓可鍊形  
門客每從書白練  
羽人頻自與丹經  
欲尋海上桃花熟  
虛滯長安有歲星

答陳憲使道襄永平見寄

乘障遠行孤竹國  
銜杯高望薊門天  
尚方履自東齊賜

大將旗從瀚海蹕足豈能參上駟登壇今幸有諸賢  
書生早綰封侯印醺酒椎牛在九邊

奉送大司馬王公還河東為李臨淮作 二首

受鉞曾登大將壇九邊重借惠文冠受降城向山陰築  
峴首碑從上谷看步履暫違天北極山川不改晉王官  
鳳麟已在雲羅外應笑南征老據鞍

典午中朝席屢虛殿頭頻上乞休書沈碑漢水當陽事  
揮涕東門疏傳車誰識倚峰臣節苦莫言前席主恩踈

縱憐松菊饒歸興竹帛勲名在石渠

送任別駕奉使還滇中

燕臺春色釀餘寒花柳千門駐馬看  
乘傳尚為金馬使對君猶着鷩鷩冠  
樓船已見宣威遠蒟醬誰知入貢難  
莫道中朝推轂少姓名書在殿南端

無題

臨水看花萬恨并焱車應自枉飛瓊  
乍離舞鏡青鸞散一落雕籠翠羽驚  
望入桂宮求不死夢回金屋可憐生

愁心不與蓬根斷  
玉虎牽絲夜到明

錦字魚箋挹泪裁  
橘雲無迹散瑤臺  
塵霾白日麒麟角  
霜老青桐鳳鳥哀  
暮雨不成虛蝶夢  
落花無賴笑鶯媒  
如何折得琅玕樹  
長向蓬山頂上栽

送潘少逸還新安

膺門聲價羨登龍  
回首平津却掃慵  
紫閣風雲看尚咫  
梁園車騎散無踪  
柳條忍向殘春折  
杯酒難期後會逢  
雙鬢對君俱落寞  
豈能留滯待東封

送沈尚寶

侍臣如雨集蓬萊詞賦翩翩入詠才典壘名應高兩省  
珥貂人已望三台  
靡蕪春送玉程去花柳晴連候館開  
若到秦淮占氣色五雲元自在燕臺

送顧憲副益卿之滇中

寒城白日下如飛臨路蒼茫一攬衣  
名自竹西傳雪賦  
人今滇海避霜威  
和戎豈盡謀臣得略地休言漢策非  
一騁壯圖猶黑髮不堪琴酒故人稀

答張助甫塞上寄懷

彩筆曾趨鳳沼東，秋風飄忽散飛鴻。  
路歧九折心仍在，雲雨千秋事不同。  
數出自應憐薄宦，久遊何意遽成翁。  
將軍日送關門喜，計畫誰收幕府功。

建節何年出武威，玉關不斷羽書飛。  
頗聞熊耳收金甲，猶自天山卧鐵衣。  
前席再承宣室召，滯遊應待茂陵歸。  
黃山白岳堪招隱，不似長安有是非。

佛日范子宣朱汝修過齋中

多病謬為趨府吏對君何異在家僧散朝微雨清丹地  
卧閣千峰擁翠層圖佛豈知成白首修心猶未到初乘  
宗雷舊似能相逐銷盡蓮花半夜燈

送孫翰林以德使楚

花外宮懸扣舜韶金函初捧下層霄絳河景氣多澄霽  
赤社風雲自動搖過里泥金榮賜第趨庭玉樹見清標  
石渠詞賦元供奉千載蘭臺未寂寥

同李襲美過感應觀訪蔣少翼



空谷少憐老俊才荷衣原不受塵埃閒邀海上青螺駕  
倒覽壺中白玉臺俠氣頓從雙鬢盡遊蹤曾記十年來  
種桃莫問玄都事避暑難逢竹下杯

過李明府襲美書室同蔣少翼小酌

畫簾初下據胡牀靜境知無簿領忙琴酒已逢嵇叔夜  
功名休羨杜當陽夾城風遞寒更急滿座霄澄列宿光  
不是栽花能爛漫門前籠燭詎成行

雨中同劉觀察李明府歐博士朱汝修諸子集李

臨淮第得風字

籌策於今借幕中退朝尊酒未曾空  
浮雲亦自憐燕館白雪真能操楚風  
賓客人多逢冠鶚扁舟予擬逐飛鴻  
竹林肯厭過逢數瑤水年年曲宴同

陳使君玉叔督餉至京師枉過旅館同歐楨伯作  
得根字

何時車騎去中原白社重來意氣存  
暮雨不妨淹使節秋花還共醉籬根  
文章浪說十年事虛薄真慚一飯恩

惟待淮南招隱賦更從梅福老吳門

陳玉叔事竣還南

長淮無浪九河清入奏真能慰聖情  
卧閣舊高循吏傳揮毫元重客卿名  
包茅貢已輸南國魚藻懽同燕鎬京  
自有廟謨酬顧問贈言東海媿王生

九日同歐博士顧舍人南都禮上人過普恩寺訪

呂山人

不共憑高送雁羣禪房寂寞對爐熏  
高僧杖錫還滄海

倦客題詩寄白雲  
古塔風烟當坐隱  
長廊鐘梵隔花聞  
浮生聚散尋常事  
來歲壺觴可對君

送郭方伯之貴竹

金馬遙天不盡悲  
白蓮高會渺難期  
行逢峻坂應驅馬  
若到空門定賦詩  
郭泰同遊多勝客  
謝公重起在明時  
聖朝政重籌邊略  
暫遣褰帷到竹祠

送劉山人子繼劉督府兄

黃鵠冥飛不可留  
自言家近岳陽樓  
漁樵未得干明主

兄弟何妨盡列侯  
千里長齋雲子飯  
五陵空敞黑貂裘  
青山到處鏡名姓  
遲我金門賦遠遊

送蔣少翼之雲中

立馬關門不可留  
黃沙白草莽生愁  
天連玄岳雲中出  
河轉桑乾地底流  
蓬萊應同仙客采  
貂裘還憶帝鄉遊  
蠻詩想在征西府  
肯羨長裙過五侯

送秦舍人汝立歸無錫時補玉官不赴

臺上黃金貯俊良  
尚書門第尚餘芳  
青藜倬直趨仙禁

銀管分曹捧御牀  
一下雲霄驚落羽  
幾回歧路歎亡羊  
東齊不是長沙遠  
一侍靈光亦不妨

送陳士鵠補騰越州

北闕秋風綰豫章  
單車人自識循良  
長途正渡滄瀾水  
清吏休論寶玉鄉  
行笥護衣無越艸  
房稽首有夷王  
漢家不事西南徼  
邛竹無勞獻上方

送洪兵備之榆林

舊日中朝典午才  
題詩曾共鳳凰臺  
抑揄莫笑三為郡


邂逅何妨數舉杯  
建節西行仙掌近  
彎弧一望蹕林開  
封泥莫閉關門路  
大宛名駒入貢來

送王舍人齋林端簡卹典至閩中兼扶侍還瓊海  
一辭仙仗下皇闈  
久直青藜許暫歸  
初拜金函持漢節  
旋裁宮錦作萊衣  
幔亭望入丹梯近  
瓊海行占紫電飛  
白首交情能不負  
鄭玄門下似君稀

送沈純父

早擬王褒頌碧雞  
南還無邨入蠻夷  
曉行露草荒山外

夜聽猿聲越水西粉署雲烟猶自媚銅駝花月使人迷  
君看車馬長安道何似青門手重攜



瑤石山人稿卷十三